

crescant; et indulgentia tua puriores, eorum gradu, quos Apostoli tui in septenarium numerum, beato Stephano duce ac praevio, Spiritu Sancto auctore, elegunt, digni existant, et virtutibus universis quibus tibi servire oportet, instructi, tibi complaceant: Per Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. *rl. Amen.*

*Deinde, cum tempus fuerit, aliquis de noviter ordinatis, dalmaticā induitus, Evangelium dicet. Ordinati autem statim, suggestente archidiacono, redeunt ad loca sua.*

## DE ORDINATIONE PRESBYTERI.

*Pro ordinatione presbyterorum parentur oleum catechumenorum; calix cum vino et aqua; patena, et hostia desuper posita; medulla panis, et bacile cum buccali pro manibus ablwendis, quas singuli ad suas mappulas extergunt.*

*Diaconis ordinatis, Pontifex ad sedendum in sede sua, vel in faldistorio, in plano iuxta cornu epistolae accedit, et cantatur Tractus, usque ad ultimum versum exclusive; vel si sit infra octavam Pentecostes, Tractus et Sequentia, usque ad ultimum versum exclusive. Interim accedunt duo capellani cum libro et candela ante Pontificem, qui ex eo legit ipsum Tractum et Sequentiam, usque ad ultimum versum exclusive. Deinde Pontifex cum mitra revertitur ante altare, ubi sedet super faldistorium.*

*Tunc archidiaconus vocat ordinandos voce intelligibili, dicens:*

*Accendant qui ordinandi sunt ad ordinem presbyteratus.*

*Et mox nominatum leguntur per notarium, prout supra dictum est, nullā tamen de titulo factā mentione. Tunc illi, more diaconorum parati amictu, albā, cingulo, stola et manipulo, tenentes planetas super brachium sinistrum*

*complicatas, et in manu dextera candelas, ac mappulas albas pro ligandis et lavandis manibus, ad Pontificem accedunt, et coram eo in modum coronae se disponunt. Tunc archidiaconus praesentat ordinandos Pontifici, dicens:*

*Reverendissime pater, postulat sancta mater Ecclesia catholica, ut hos praesentes diaconos ad onus presbyterii ordinetis.*

*Et Pontifex interrogat, dicens:*

*Scis illos dignos esse?*

*Respondet archidiaconus:*

*Quantum humana fragilitas nosse sinit, et scio, et testificor ipsis dignos esse ad huius onus officii.*

*Pontifex dicit: Deo gratias.*

*Et annuntiat clero et populo, dicens:*

*Quoniam, fratres carissimi, rectori navis, et navigio deferendis eadem est, vel securitatis ratio, vel communis timoris; par eorum debet esse sententia, quorum causa communis existit. Neque enim fuit frustrā à patribus institutum, ut de electione illorum, qui ad regimen altaris adhibendi sunt, consulatur etiam populus: quia de vita et conversatione praesentandi, quod non nunquam ignoratur à pluribus, scitur à paucis; et necesse est, ut faciliū ei quis obedientiam exhibeat ordinato, cui assensum praebuerit ordinando. Horum siquidem diaconorum in presbyteros, auxiliante Domino, ordinandorum conversatio (quantum mihi videtur) probata, et Deo placita existit, et digna (ut arbitror) ecclesiastici honoris augmento. Sed ne unum fortasse vel paucos, aut decipiat assensiō, vel fallat affectio, sententia est expetenda multorum. Itaque quid de eorum actibus aut moribus noveritis, quid de merito sentiatis liberā voce pandatis; et his testimonium sacerdotii magis pro merito quam affectione aliqua, tribuat. Si quis igitur habet aliiquid contra illos, pro Deo, et propter Deum cum fiducia exeat, et dicat; verumtamen memor sit conditionis suaee.*

*Postea Pontifex, facta aliquid mōrā, convertens sermonem suum ad ordinandos, admonet eos, dicens:*

Consecrandi, filii dilectissimi, in presbyteratus officium, illud dignè suscipere, ac susceptum laudabiliter exequi studeatis. Sacerdotem enim oportet offerre, benedicere, praesesse, praedicare et baptizare. Cum magno quippe timore ad tantum gradum adscendendum est, ac providendum ut coelestis sapientia, probi mores et diuina iustitiae observatio ad id electos commendent. Unde Dominus praeipiens Moysi, ut septuaginta viros de universo Israël in adiutorium suum eligeret, quibus Spiritus Sancti dona divideret, suggessit; quos tu nōsti, quod senes populi sunt. Vos siquidem in septuaginta viris et senibus signati estis; si per Spiritum septiformem, Decalogum legis custodientes, probi et maturi in scientia similiter et opere eritis. Subeodem quoque mysterio, et eadem figurā, in Novo Testamento Dominus septuaginta duos elegit, ac binos ante se in praedicationem misit; ut doceret verbo simul et facto, ministros Ecclesiae suae fide et opere debere esse perfectos, seu geminae dilectionis, Dei scilicet et proximi, virtute fundatos. Tales itaque esse studeatis, ut in adiutorium Moysi et duodecim Apostolorum, Episcoporum videlicet Catholicorum, qui per Moysen et Apostolos figurantur, dignè, per gratiam Dei, eligi valeatis. Hac certè mira varietate Ecclesia sancta circumdat, ornat et regitur; cùm alii in ea pontifices, alii minoris ordinis sacerdotes, diaconi, et subdiaconi diversorum ordinum viri consecrantur; et ex multis, et alternae dignitatis membris unum corpus Christi efficitur. Itaque, filii dilectissimi, quos ad nostrum adiutorium, fratrum nostrorum arbitrium consecrandos elegit, servate, in moribus vestris, castae et sanctae vitae integritatem. Agnoscite quod agitis; imitamini quod tractatis, quatenus mortis Dominicæ mysterium celebrantes, mortificare membra vestra à vitiis et concupiscentiis omnibus procuretis. Sit doctrina vestra spiritualis medicina populo Dei; sit odor vitae vestrae delectamentum Ecclesiae Christi; ut praedicatione atque exemplo aedificetis domum, id est, familiam Dei, quatenus nec nos de vestra provectione, nec vos de tanti officii susceptione dampnari

à Domino, sed remunerari potius mereamur. Quod ipse nobis concedat per gratiam suam. R. Amen.

*Si non sint factae ordinationes subdiaconorum vel diaconorum, dicuntur Litaniae, ut suprà in ordinatione subdiaconorum dictum est, pag. 423. Post haec, surgunt omnes, et ordinandis coram Pontifice binis et binis successivè genuflexentibus, Pontifex, stans ante faldistorium suum cum mitra, et nulla oratione nulloque cantu preammissis, imponit simul utramque manum super caput cuiuslibet ordinandi successive, nihil dicens. Idemque faciunt post eum omnes sacerdotes qui adsunt, quorū tres aut plures, planetis, vel saltem cum stolis, parati, si commodè fieri potest, esse deberent. Quo facto, tam Pontifex quam sacerdotes tenent manus dexteræ extensas super illos. Et Pontifex, stans cum mitra, dicit:*

Oremus, fratres carissimi, Deum Patrem omnipotentem, ut super hos famulos suos, quos ad presbyterii munus elegit, coelestia dona multiplicet; et quod eius dignatione suscipiant, ipsius consequantur auxilio. Per Christum Dominum nostrum. R. Amen.

*Pontifex, deposita mitra, conversus ad altare, dicit: Oremus.*

*Et ministri: Flectamus genua. R. Levate.*

*Et mox, conversus ad ordinandos, dicit:*

Exaudi nos, quassumus, Domine Deus noster, et super hos famulos tuos bene  $\ddot{\chi}$ ditionem Sancti Spiritus, et gratiae sacerdotalis infunde virtutem; ut quos tuae pietatis aspectibus offerimus consecrandos, perpetuā munera tui largitate prosequaris. Per Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti, Deus.

*Tum, extensis manibus ante pectus, dicit:*

*Per omnia saecula saeculorum. R. Amen.*

*¶. Dominus vobiscum. R. Et cum spiritu tuo.*

*¶. Sursum corda. R. Habemus ad Dominum.*

*¶. Gratias agamus Domino Deo nostro.*

*¶. Dignum et iustum est.*

*Verè dignum et iustum est, aequum et salutare, nos tibi semper et ubique gratias agere, Domine sancte, Pa-*

ter omnipotens, aeterne Deus, honorum auctor, et distributor omnium dignitatum; per quem proficiunt universa; per quem cuneta firmantur, amplificatis semper in melius naturae rationalis incrementis, per ordinem congruā ratione dispositum. Unde et sacerdotales gradus, atque officia levitarum, sacramentis mysticis instituta creverunt: ut cùm Pontifices summos regendis populis praefecisses, ad eorum societatis et operis adiumentum, sequentis ordinis viros, et secundae dignitatis eligeres. Sic in eremo per septuaginta virorum prudenter mentes, Moysi spiritum propagasti; quibus ille adiutoribus usus, in populo innumeritas multitudines facilē gubernavit. Sic et in Eleazarum et Ithamarum filios Aaron paternae plenitudinis abundantiam transfusisti; ut ad hostias salutares, et frequentioris officii sacramenta ministerium sufficeret sacerdotum. Hac providentiā, Domine, apostolis Filii tui doctores fidei comites addisti, quibus illi orbem totum secundis praedicationibus impleverunt. Quapropter infirmitati quoque nostrae, Domine, quae sumus, haec adiumenta largire; qui quanto fragiliores sumus, tantò his pluribus indigemus. Da, quae sumus, omnipotens Pater, in hos famulos tuos presbyterii dignitatem; innova in visceribus eorum spiritum sanctitatis; ut acceptum à te, Deus, secundi meriti munus obtineant, censuramque morum exemplo suae conversationis insinuent. Sint providi cooperatores ordinis nostri; eluceat in eis totius forma iustitiae, ut bonam rationem dispensacionis sibi creditae reddituri, aeternae beatitudinis praemia consequantur.

*Quod sequitur legat planè, ita tamen, quod à circumstantibus audiri possit.*

Per eudem Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. R. Amen.

*Pontifex sedet, accepta mitra, et reflectit orarium, sive stolam ab humero sinistro cuiuslibet, capiens partem quae retrò pendet, et imponens super dexterum humerum, appetat eam ante pectus in modum crucis, singulis dicens:*

Accipe iugum Domini; iugum enim eius suave est, et onus eius leve.

*Postea, imponit cuilibet successive casulam usque ad scapulas, quam quilibet teneat super humeros complicata, à parte anteriori deorsum dependentem, singulis dicens:*

*Accipe vestem sacerdotalem, per quam caritas inteligitur; potens est enim Deus, ut augeat tibi caritatem, et opus perfectum. R. Deo gratias.*

*Surgit Pontifex sine mitra, et omnibus genua flectentibus, dicit:*

Deus sanctificationum omnium auctor, cuius vera consecratio, plena benedictio est, tu, Domine, super hos famulos tuos, quos ad presbyterii honorem dedicamus, munus tuae bene*X*ictionis infunde; ut gravitate actuū, et censurā vivendi probent se seniores, his instituti disciplinis quas Tito et Timotheo Paulus exposuit ut in lege tua die ac nocte meditantes, quod legerint, credant; quod crediderint, doceant; quod docuerint, imitentur; iustitiam, constantiam, misericordiam, fortitudinem, caeterasque virtutes in se ostendant; exemplo praebeant; admonitione confirmant; ac purum et immaculatum ministerii sui donum custodiant; et in obsequium plebis tuae, panem et vinum in corpus et sanguinem Filii tui immaculatā benedictione transformant; et inviolabili caritate in virum perfectum, in mensuram aetatis plenitudinis Christi, in die iusti et aeterni iudicij Dei, conscientiā purā, fide verā, Spiritu Sancto pleni resurgent. Per eudem Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. R. Amen.

*Tunc Pontifex, sine mitra, ante altare conversus, flexis genibus, incipit alta voce, schola prosequente, hymnum:*

*Veni, creator Spiritus,*

*Mentes tuorum visita,*

*Imple supernā gratiā*

*Quae tu creāsti pectora.*

*Surgit Pontifex, et facit ut in fine hymni habetur; interim schola prosequitur hymnum, qui, si propter ordinandorum multititudinem necesse fuerit, repetatur, omissio primo versu.*

*Qui diceris Paraclitus,  
Altissimi domum Dei,  
Fons vivus, ignis, caritas,  
Et spiritualis unctio.  
Tu septiformis munere,  
Digitus Paternae dexteræ,  
Tu ritè promissum Patris,  
Sermone ditans guttura.  
Accende lumen sensibus,  
Infunde amorem cordibus,  
Infirma nostri corporis,  
Virtute firmans perpeti.  
Hostem repellas longius,  
Pacemque dones protinus,  
Ductore sic te prævio,  
Vitemus omne noxiun.  
Per te sciamus da Patrem,  
Noscamus atque Filium,  
Teque utriusque Spiritum  
Credamus omni tempore.  
Deo Patri sit gloria,  
Et Filio qui à mortuis  
Surrexit, ac Paraclito,  
In saeculorum saecula. n. Amen.*

*Dicto primo versu, surgit Pontifex, et sedet in faldistorio cum mitra; et depositis chirotecis, et annulo pontificali reassumpto, ponitur ei gremiale, sive mappula super gremium, et singuli ordinandi successives coram eo genua flectunt; et Pontifex cum oleo catechumenorum inungit unicuique ambas manus simul iunctas, in modum crucis, producendo cum pollice suo dexterò in dictum oleum intincto duas lineas, videlicet, à pollice dexteræ manus usque ad indicem sinistram, et à pollice sinistram*

*usque ad indicem dexteræ, ungendo mox totaliter palmas, dicens, dum quilibet inungit:*

*Consecrare et sanctificare digneris, Domine, manus istas, per istam unctionem, et nostram benedictionem. n. Amen.*

*Pontifex producit manu dexterâ signum crucis super manus illius quem ordinat, et prosequitur:*

*Ut quaecumque benixerint, benedicantur, et quaecumque consecraverint, consecrentur et sanctificantur, in nomine Domini nostri Iesu Christi.*

*Et quilibet ordinandus respondet: Amen.*

*Tum Pontifex claudit seu iungit manus cuilibet successivæ, quas sic consecrata aliquis ministrorum Pontificis albo panniculo linea simul, videlicet dexteram super sinistram alligat; et mox unusquisque ad ordinem suum redit, et sic clausas et alligatas manus tenet. Omnium manus unctis et consecratis, Pontifex pollicem micâ panis tergit; tum tradit cuilibet successivè calicem cum vino et aqua, et patenam superpositam cum hostia, et ipsi illam accipiunt inter indices et medios digitos, et cuppam calicis et patenam simul tangunt, Pontifice singulis dicente:*

*Accipe potestatem offerre sacrificium Deo, missasque celebrare, tam pro vivis quam pro defunctis. In nomine Domini. n. Amen.*

*His peractis, Pontifex lavat manus cum medulla panis, et aqua lotionis huiusmodi proicitur in sacrarium. Deinde cum mitra revertitur ad sedem suam, vel ad faldistorium in cornu epistolæ, in plano sibi paratum, ubi sedet cum mitra. Et chorus cantat ultimum versum tractus vel sequentiae, sive Alleluia. Interim accidunt duo capellani ante Pontificem cum libro et candela, qui ex eo legit ultimum versum tractus vel sequentiae, sive Alleluia. Legit etiam secretæ Munda cor meum, atque evangelium.*

*Interea unus ex diaconis noviter ordinatis accedit ad altare cum texu Evangelii ante pectus, et dicit: Munda cor meum, etc., et cantat evangelium. Interim parantur per ministros hostiae super altare, pro numero ordinatorum in ordinibus sacris, qui omnes communicare debent, et proceditur in missa, ordine solito. Interea dum offer-*

torum cantatur, vel etiam prius, ordinati sacerdotes poterunt lavare manus suas, cum medulla panis et aqua benè mundare, atque extergere mappulis illis quibus ligatae erant, et aqua ablutionis huiusmodi proiiciuntur in sacramentum.

Pontifex vero, offertorio lecto, accepta mitra, vadit ad faldistorium ante medium altaris, et ibi, sedens, accipit offertorium ab omnibus ordinatis, qui omnes accedunt bini et bini ad Pontificem, coram quo genuflexi offerunt illi singulas candelas accensas, et osculantur eius manum, primò presbyteri, tum diaconi successivè, et alii suo ordine.

Accepto singulorum offertorio, Pontifex lavat manus, et surgit sine mitra, ac tollitur faldistorium, et prosequitur missam.

Presbyteri vero ordinati, post Pontificem, vel hinc et inde, ubi magis commodum erit, in terra genuflexi, habent libros coram se, dicentes:

Suscipe, sancte Pater, etc., et omnia alia de missa, prout dicit Pontifex: qui tamen benè advertat, quid secretas morosè dicat, et aliquantulum altè, ita ut ordinati sacerdotes possint secum omnia dicere, et praesertim verba consecrationis, quae dici debent eodem momento per ordinatos, quo dicuntur per Pontificem.

Secreta pro ordinatis dicuntur cum secreta missae diei, sub uno, Per Dominum, etc.

Cum Pontifex dixerit orationem, Domine Iesu Christe, qui, etc., osculatur altare, et dat primo ex singulis ordinatis cuiuslibet ordinis sacri ad eum successive accedenti, et altare prius ad dexteram Pontificis deosculanti, pacem, dicens: Pax tecum.

Cui ille respondet: Et cum spiritu tuo.

Et quilibet illorum dat sequenti sui ordinis secum ordinato, et ille alteri; et sic usque ad ultimum continuatur. Si autem ordinatorum parvus sit numerus, Pontifex poterit dare pacem singulis. Postquam vero Pontifex se communicaverit, et totum sanguinem sumperit, priusquam digitos abluit, accedunt ante altare presbyteri, deinde diaconi, tandem subdiaconi; quibus ordinatis dis-

positis et genuflexis, Pontifex, facta reverentia Sacramento, et aliquantulum versus cornu evangelii se retrahens, ad eos se convertit, et singuli ex diaconis et subdiaconis tantum dicunt submissa voce:

Confiteor Deo, etc. Et si officium fiat in cantu, unus de noviter ordinatis illud cantat.

Et Pontifex, stans, capite detecto, versus ad eos, dicit intelligibili voce, nisi officium fiat in cantu:

Misereatur vestri omnipotens Deus, et, dimissis peccatis vestris, perducat vos ad vitam aeternam. R. Amen.

Indulgentiam, absolutionem, et remissionem peccatorum yestrorum tribuat vobis omnipotens et misericors Dominus. R. Amen.

Et manu dexterā signum crucis super eos communiter producit. Presbyteri ante communionem non dicunt confessionem, nec datur eis absolutionis, quia concelebrant Pontifici; propterea si non sunt alii ordinati, confessio et absolutionis praedictae omittuntur.

Tunc accedunt ordinati ad supremum gradum altaris, bini et bini. Pontifex vero ponit plures hostias consecratas super patenam, quam ori cuiuslibet communicandi supponit, et singulos communicat, cuiilibet dicens:

Corpus Domini nostri Iesu Christi custodiat te in vita aeternam.

Quilibet respondet: Amen.

Et priusquam communionem sumat, manum Pontificis hostiam tenentem osculatur.

Unus ministrorum Pontificis stat iuxta cornu epistolae altaris, calicem habens, non illum cum quo Pontifex celebravit, sed alium cum vino, et mappulam mundam in manibus, ad quem singuli communicati accedunt, et se purificant, os extergunt, et ad partem se locant. Omnibus communicatis, Pontifex extergit patenam super calicem suum, super eum digitos abluit, sumit ablutionem, accipit mitram, et lavat manus.

Pontifex, lotis manibus, mitra deposita, stans in cornu epistolae altaris, versus ad illud, inchoat in cantu, schola prosequente, Responsorium, quod à Septuagesima usque ad Pascha dicitur sine Alleluia,

8. ton. Iam non dicam vos servos, sed amicos meos, quia omnia cognovistis quae operatus sum in medio vestri. Alleluia. \* Accipite Spiritum Sanctum in vobis paracletum. \* Ille est, quem Pater mittet vobis. Alleluia.

Y. Vos amici mei estis, si feceritis quae ego praecipio vobis. \* Accipite.

Y. Gloria Patri, et Filio, et Spiritui Sancto. \* Ille est quem.

*Incepto responsorio, Pontifex, accepta mitra, verit se ad presbyteros ordinatos, qui, ante altare coram ipsis stantes, profertur fidem quam praedicaturi sunt, dicentes:*

Credo in Deum, Patrem omnipotentem, creatorem coeli et terrae. Et in Iesum Christum, Filium eius unicum, Dominum nostrum: qui conceptus est de Spiritu Sancto, natus ex Maria Virgine: passus sub Pontio Pilato, crucifixus, mortuus et sepultus: descendit ad inferos, tertia die resurrexit a mortuis: adscendit ad caelos, sedet ad dexteram Dei Patris omnipotentis: inde venturus est iudicare vivos et mortuos. Credo in Spiritum Sanctum; sanctam Ecclesiam catholicam; Sanctorum communionem; remissionem peccatorum; carnis resurrectionem; vitam aeternam. Amen.

*Quo finito, Pontifex, cum mitra sedens super faldistorium ante medium altaris, imponit ambas manus super capita singulorum coram eo genuflectentium, dicens cuilibet:*

Accipe Spiritum Sanctum; quorum remiseris peccata, remittuntur eis; et quorum retinueris, retenta sunt.

*Deinde, explicans casulam quam unusquisque habet super humeros complicatam, induit illa quemlibet, singulis dicens:*

Stola innocentiae induat te Dominus.

*Et mox unusquisque iterum ad Pontificem accedit, et genuflexus ponit manus suas iunctas inter manus Pontificis dicens cuilibet, si sis ordinarius:*

Promittis mihi et successoribus meis reverentiam et obedientiam?

*Et ille respondet: Promitto.*

*Singulis vero Regularibus:*

Promittis Praefato ordinario, etc.

Promittis Pontifici (*vel Praefato*) ordinario tuo pro tempore existenti reverentiam et obedientiam?

*Et ille respondet: Promitto.*

*Si vero Pontifex non est suus ordinarius, dicit singularis, cum manus eorum inter suas tenet, ut praefertur:*

Promittis Pontifici ordinario tuo reverentiam et obedientiam?

*Et ille respondet: Promitto.*

*Tunc Pontifex, tenens manus illius inter suas, osculatur unumquemque, dicens: Pax Domini sit semper tecum.*

*Et ille respondet: Amen.*

*His expletis, et eis ad ordinem suum reversis, Pontifex, sedens cum mitra et baculo, admonet eos, dicens:*

Quia res quam tractaturi estis satis periculosa est, filii dilectissimi, moneo vos ut diligenter totius missae ordinem, atque hostiae consecrationem, ac fractionem, et communionem, ab aliis iam doctis sacerdotibus discessatis, priusquam ad celebrandam missam accedatis.

*Pontifex surgit cum mitra et baculo, et presbyteris coram eo adhuc genuflexis benedicit, dicens, voce competenti:*

Benedictio Dei omnipotentis, Patris, et Filii, et Spiritus Sancti, descendat super vos, ut sitis benedicti in ordine sacerdotali, et offeratis placabiles hostias pro peccatis atque offenditionibus populi, omnipotenti Deo, cui est honor et gloria, per omnia saecula saeculorum. Amen.

*Post haec Pontifex, deposita mitra, et amoto faldistro, convertitur ad altare, prosequitur missam, et cantatur communio: et dicitur postcommunio pro ordinatis sub uno Per Dominum, cum postcommunione missae diei:*

*Deinde dicitur Benedicamus Domino, vel Ite, missa est, prout tempus requirit; et per Pontificem, Placeat tibi sancta, etc.*

*Quo dicto, Pontifex, accepta mitra et baculo pastori, dat benedictionem solitam, dicens:*

*'Sit nomen Domini benedictum, etc.*

*Tum sedet, et alloquitur ordinatos sub his verbis:*

Fili! dilectissimi, diligenter considerate ordinem per vos susceptum, ac onus humeris vestris impositum; stude sancte et religiosè vivere, atque omnipotenti Deo placere, ut gratiam suam possitis acquirere, quam ipse vobis per suam misericordiam concedere dignetur.

Singuli ad primam tonsuram, vel ad quatuor minores ordines promoti, dicit semel septem psalmos poenitentiales, cum litanii, versiculis et orationibus; ad subdiaconatum, vel diaconatum, nocturnum talis diei. Ad presbyteratum vero ordinati, post primam vestram missam, tres alias missas, videlicet, unam de Spiritu Sancto, aliam de beata Maria semper virgine, tertiam pro fidelibus defunctis dicite, et omnipotentem Deum etiam pro me orate.

*Quod illi devotè suscipiunt, et respondent se facturos.*

*Tum Pontifex convertit se ad altare, et dicit, submissa voce:*

*Dominus vobiscum.*

Initium sancti Evangelii secundum Ioannem. In principio, etc.

*Signat altare et se, et revertitur ad sedem, vel ad fal-distorium, ubi exigitur sacris vestibus. Ordinati etiam ad presbyteratum dicunt idem evangelium, et in loco convenienti sacras vestes deponunt, et cum eis alii ordinati,*

#### MONITA AD PRESBYTEROS RECENS ORDINATOS.

*Cum experientia constet, novos sacerdotes in missa suaे ordinationis in varios defectus prolabi solitos esse, et multis difficultibus idcirco implicari, quod variae missae partes in variis Missalis partibus requirienda sint, nec continuae occurrant; opere pretium visum est, missas cuiilibet ordinationi proprias, ex Missali excerptas, in eorum gratiam et commodum typis hic mandare, ut una*

*cum Pontifice, sicuti tenentur, singula missae verba proferre et celebrare facilius possint.*

*Haec praeterea visum fuit eos commonere.*

1.<sup>o</sup> *Missam ordinationis, aliquot antea diebus; praevideant et perlegant, ne quo tempore dicenda erit, quidquam eos impedit aut retardet.*

2.<sup>o</sup> *Ob reverentiam ordinationis, ornamenta munda et nitida sibi provideant, et quidem, iuxta sacrorum rituum peritiiores, albi, quod fieri poterit, coloris.*

3.<sup>o</sup> *Noverint actiones et caeremonias quas in missa peragit Pontifex, sibi non esse peragendas: sed satis esse quod singula missae verba attente et devotè una cum illo recitent, incipiendo ab istis: Suscipe, sancte Pater, etc. Cum missa ordinationis celebretur ritu solemni, sola dicitur oratio de die cum alia pro ordinandis sub eadem conclusione; commemorationes vero occurrentes praetermittuntur.*

4.<sup>o</sup> *Eamdem cum Pontifice habeant intentionem, ut pote quia una cum ipso ex consuetudine offerunt et consecrant.*

5.<sup>o</sup> *Flectant genua ab offertorio usque ad finem missae.*

6.<sup>o</sup> *Attendant diligenter ita submissa voce omnia verba proferre, ut ab omnibus Pontifex audiatur; et ita simul cum eo pronuntient, ut nec praecedant, nec protractant tardiū, quod praecipue in verbis consecrationis observabunt.*